

M110: Daz himelrîche

- 1,1 michel bis dû hêre got unde lobelich harte .
 1,2 michel ist [dîn] kraft ûf dere himelischen warte .
 1,3 dîn rîche ist gelegen hôhe obe allen rîchen .
 1,4 dînem gewalte mac nieman entvliehen noch entwîchen .
 1,5 des ne darf halt nieman wænen noch sinnen .
 1,6 daz dir ieman iener hine mege entrinnen .
 1,7 dînere êren . dînes wîstuomes ist niht zale .
 1,8 von obereste des himeles in daz apgründe ze tale .
 1,9 von ôsteret in westert . vone mere ze mere .
 1,10 lobent dich dere engele joch dere mennischen hêre .
 1,11 allenthalben des umberinges sint die dich êrent .
 1,12 sint . die iz ire kint ouch gerne guotlîche lêrent .
 1,13 alle dîne hantgetæte . alle dîne geschefte .
 1,14 sint umbevangen mit dînere magenkrefte .
 1,15 mit dînere zeswen ellenthaften tugende
 1,16 sint beschirmet . sint gefirmet alter unde jugende .
 1,17 sint elliu dinc bewaret . sint gelîche gescharet
 1,18 daz ire necheinez daz andere vone geschihite ne taret .
 1,19 nihwan alsô dû über iegelîchez verhenges .
 1,20 dû daz [zît] alsô dû wil kürzes unde lenges .
 1,21 dû hâst in gebrûche dînere gewaltigen hende .
 1,22 allere dinge anegenge joch den ende .
 1,23 ouch sint ze wære unverholen in dînere gesihte .
 1,24 allere brusten gelüste . allere herzen urgihte .
 1,25 vone diu heizes dû in kriechischen alpha et omega
 1,26 [sô] [izz] [uns] [hât] [kund] getân Johannis revelatio .
 1,27 des heiligen . des tiurlîchen evangelistae .
 1,28 dînes sunderlîchen trûtes domine Jesû Christe .
 1,29 wellent iz ouch Walhe unde Krieche genôte suochen .
 1,30 si vindent iz geschriben in hêbrêischen buochen .
 1,31 daz dû unzwîvellîche alles werkes dînes .
 1,32 eine bis initium unde ervollenter finis .
- 2,1 selbe ne hâst dû anegenge noch verwesenten ende .
 2,2 dannen ne magen dich die stete noch die wende .
 2,3 decheine halben umbegeben noch umbeschrîben .
 2,4 verrer noch nâher . ûz oder in getriben .
 2,5 dich minnent unde êrent . vûrhtent unde vlêhent driu rîche .

2,6 dere dû waltes . unde gehaltenes . rihtes joch pflihtes ungelîche .
 2,7 dei dû zechest unde antreites . enges unde breites . alsô dû wil .
 2,8 hoehest unde nideres . gebiutes ire sîn lützel oder vile .
 2,9 mêres oder minneres si nâch dînem willen .
 2,10 âne dich mac si nieman geswiften noch gestillen .
 2,11 nieman anderre kan si gerihten noch gekêren .
 2,12 gezûhtigen . des lîbes oder dere sêle reht gelêren . daz êreste .
 2,13 daz hêreste ist daz firmamentum .
 2,14 daz hât iemer ane ze huote milia centum .
 2,15 dâr übere vile manic tûsent dere engele .
 2,16 wider den iz ervehten ne magen die übergengele .
 2,17 daz hât dîn wîstuom sô gevestenet von deme anegenge .
 2,18 daz iz stæte hât dere êwicheite in dere tage lenge .
 2,19 geslîfen noch gewîchen . noch gevallen ne mac .
 2,20 sît diu erde vone dînem gebote dâr under gelac .
 2,21 dâ wir ûfe in ungewisse tâtliche leben .
 2,22 unze wir den geist an dere hineverte widere geben .
 2,23 sô verenden wir ditze leben untâtlichen .
 2,24 ob iz dir allerêreste hier beginnet wole lîchen .
 2,25 vone diu heizet daz nidere terra morientium .
 2,26 daz oberere dâr engegen terra viventium% .
 2,27 dâ bat der hêrre Dâvît daz sîn teil müese sîn .
 2,28 dare schaffe ich bî dînen genâden ouch gerne daz mîn .
 2,29 wande dâ nieman erwirdet . zegêt . noch erstirbet .
 2,30 hier verbiderbet sich der lîp unze er gare verderbet .
 2,31 des geschihet weiz ich wole alanc dâ niht .
 2,32 dâ êwîliche schînet daz unzeganclîche

3,1 lieht . dâ ûfe ist ouwî daz wûnnesame himelrîche .
 3,2 deme sint dei anderen zwei dere êren vile ungelîche .
 3,3 dei ich dâ vore mit dere rede gerüeret hân .
 3,4 daz si ouch dir mit rehte sîn undertân .
 3,5 dannen ich noch genuoc sagen sol obe gote wile .
 3,6 wande diu sêle vorderet sô getân spil .
 3,7 unde ire daz vore allen dîngen ist sîeze .
 3,8 daz si mit ire gote sô unde sus lantrehten müeze .
 3,9 dere êren ist iz uns joch des wesenes verre obe .
 3,10 dâ dich gedîhte erheben mit sange joch mit lobe .
 3,11 dîne engele hêre canore iubilo ane underlâz .
 3,12 dâ ist der bezziste der sîezeste wâz .
 3,13 dâ diu sælige burc tagelîches gezimberet wirdet .
 3,14 dâ dû selbe inne bist küninc unde wirt .
 3,15 dâr inne gênt von vier halben zweliv bûrgetor .
 3,16 dâ stêt inne diu schoene pfalenze hôhe enbore .
 3,17 dâ umbe in gelîchere antreite zweliv türne .
 3,18 die sint ervüllet mit lobesanges schalle diurno .
 3,19 mit den edelen steinen sint si wole gezinnet .
 3,20 in ebener mâze . dû hât grôze geminnet .

- 3,21 den dû ze den êwen dâr ûf hâst wesen geschaffet .
 3,22 si ne ruochent waz der vîant ûzerhalbe geklaffet .
 3,23 innerhalbe habent si sicherheite grôze .
 3,24 si ne erkoment vone sînem îtelen dôze .
 3,25 ob er ouch dare getorste oder mohte genæhen .
 3,26 ich geloube wole daz si in abe vallen sæhen .
 3,27 die in êr wîlen sâhen unsamfte benîchen .
 3,28 alsô die donerstrâle die man sihet gâhes verblîchen .
 3,29 wande die selben habent die burc noch in ire huote .
 3,30 alsô si sie dô behabeten mit stætigem muote .
 3,31 den si hêten unde habent zuo ire hêrren liebe .
 3,32 si ne lâzent dâr nâher geluogen die nahtdiebe .
- 4,1 diu naht dirre werlte schetewet dâr in alanc niht .
 4,2 iht mêre ne schînet dâ des werltlîchen tages licht .
 4,3 got selbe erliuhtet die burc joch den sal dâr inne .
 4,4 si ne bedarf lichtes . des sunnen noch dere mæninne .
 4,5 dere sternên hât si rât joch anderre lichtvazze .
 4,6 von reinem golde glenstet ein iegelich ire gazze .
 4,7 die mûre sint alumbe mit golde gewieret .
 4,8 sint mit aller slahte varwe gimmen wole gezieret .
 4,9 des sales esterîch ist mit vêhen steinen gestrôuwet .
 4,10 dâr hâs dû hêrre die burgære wole mit gevrôuwet .
 4,11 dâ zuo ne gebristet glases noch saphîres .
 4,12 von den sæligen wirdet dâ gesehen diu schoene îrîs .
 4,13 in dere wîten umbeverte des hôchstuoles .
 4,14 ze sicherheite hinnen mêre des vîantlîchen wuoles .
 4,15 den der tiuvel under den engelen wîlen begie .
 4,16 dô er hier bevore engegen dir ze widerbruhte gevie .
 4,17 daz wir under deme der ûf deme stuole sitzet .
 4,18 vone des vorhten der wüeterîch angestlîche switzet .
 4,19 alles unvrîdes mêre sulen gewislîche sicher sîn .
 4,20 daz dâr ane ist gotes genâden ouch worden schîn .
 4,21 daz er an sîneme gerihte pfleget necheinere miete .
 4,22 der in îsenîner gerte rihtet liute unde diete .
 4,23 unde brichet si zesamene daz ire got ergaz .
 4,24 die den unvrîde machent . alsô eines havenæres vaz .
 4,25 dannen ist uns ouch îrîs in kriechischer zungen .
 4,26 dicke von den alten buochmeistern vore gesungen .
 4,27 daz ez sî geheizen name des regenbogen .
 4,28 den man ofte sihet sô den himel habent bezogen . dei – tunkelen .
 4,29 joch dei dicken regenwolken .
 4,30 daz allîche niht gewizzenlich ist den smâchvolken .
 4,31 die kunst lâzen wir besunder den dînen wole geêrten .
 4,32 in dînerê ê vernunstlîche den allerebeste gelêrten .
- 5,1 ich ne getar nâch deme geiste erbalden mêr baz .
 5,2 ze erluogenne sîne sundergenge bin ich leider vile laz .

- 5,3 sūmic unde seine geistlīchiu dinc ersuoehen
5,4 joch dere ich gewissez urkūnde vinde an den buochen .
5,5 sô ich vūrhte daz mich gāhes ze dere unwârheite .
5,6 mîn unvorebesehener sin ungewerlīche verleite .
5,7 unde sô ich wāne daz ich zuo dere wârheite done .
5,8 dîn getougenez urteile getrîbet mich dâr vone .
5,9 daz ich verliese die arbeite mînere anedæhte .
5,10 dâ ich gerne mînen antheiz [er] vüre dich bræhte .
5,11 doch sage ich daz mich gelêret hât mîn magezoge .
5,12 von gehilwe unde heitere wirdet der regenboge .
5,13 vone des sunnen wirmen joch dere wolkene viuhte .
5,14 alsô des viures glanst durch daz wazzer liuhte .
5,15 daz dritte dâr under ist des himeles varwe glūche .
5,16 ich wāne in diu erde an ietwederem orte zuo sich lūche .
5,17 dâ gestêt dere boge von vier vürstelīchen elementis .
5,18 dei uns temperent die âtemzuht animae calentis .
5,19 joch in alle wîs die stete behabent des gesundes .
5,20 nâch dînere gesetzede in die tiefe allere dinge grundes .
5,21 dar wir gelangen
5,22 mit vūnv sinnen des lîbes ne magen . mit vūnven dere sêle waz magen wir
dann sagen .
5,23 nihwan daz dû hêrre got antreitære dere dinge .
5,24 ein hêrlich wunder bist swie halt uns dâr ane gelinge .
5,25 dû makes uns daz dinc ze wundere unde ze wūnnen .
5,26 ob wir sin unde rede ne hieten die wir niemer gewonnen .
5,27 nû hâs dû uns hoehe unde tiefe des sinnes gegeben .
5,28 tuo dâr zuo daz wir in lenge unde in breite zieren daz leben .
5,29 nâch dînen hulden nâch unseren nôtdürften mit guote .
5,30 sô wirdet uns geringet unde geliuteret vone dir daz gemüete .
5,31 daz wir gedenken wes unsich der regenboge manet .
5,32 sô sî diu gehuht von anderen sachen erwanet .
- 6,1 wazzer unde viur sint schînic an dem regenbogen .
6,2 dei ich bilediclīche in die rede hân gezogen .
6,3 durh daz si beidiu sint helfelich unde heilsame .
6,4 ire ietwederez ist ouch egelich unde vreissame .
6,5 sô si von dere liute sünden übermæzic sint .
6,6 unde si dâr zuo trîbent daz weter unde den heifter wint .
6,7 wazzer unde viur sint zwei starkiu gotes gerihte .
6,8 dei dere werlte allere sint offen ze gesihte .
6,9 mit deme wazzere wart diu werlt hier bevore gereinet .
6,10 mit deme viure here nâch an den die sich habent vermeinet .
6,11 die dô gotes hulde hêten . genâsen in dere arke .
6,12 die denne in sînen genâden sint gesigent starke .
6,13 dô bestuonten nihwan ahte mennischen in dere sinvluote .
6,14 die rehte in ahte sælden gelebent genesent in dere glüete .
6,15 dô wart diu erde von dere liute unrehte gewaschen .
6,16 denne wirdet si überal mit rehte bekêret in aschen .

6,17 daz ergangene wizzen wir . des kûmftigen gewarten wir .
 6,18 daz iz genædiclich über unsich werde des digen wir ze dir .
 6,19 des louges varwe die wir an dem bogen sehen .
 6,20 warnet unsich kristene wir dere gelouben verjehen .
 6,21 daz wir ze dem jungesten urteile haben sorgen .
 6,22 daz iz uns von ungewissere sicherheite iht sî verborgen .
 6,23 daz wir jenez mêre ne vûrhten tuot er uns ouch kunt .
 6,24 dannen heizet irin ouch vride der kriechische munt .
 6,25 wande er dînen vride vore zeichenet den liuten .
 6,26 daz wir kunnen gedenken wazz iz sule bediuten .
 6,27 daz in dîne holden umbe dînen stuol sehent .
 6,28 dâ dir einem gote dîne barmherze verjehent .
 6,29 des wir sumelîche noch niht ne magen wizzen .
 6,30 wir unsich minner deme rehten haben gevîzen .
 6,31 in dînen wunderen hêrre mit geistlîchere triffe .
 6,32 sô iz die lêrære habent in dere heiligen schrifte .

7,1 noch sâ die wizzen iz ze durchslahte alanc niht .
 7,2 unze uns ze jungeste erschînet daz êwige licht .
 7,3 daz den schate verwîset dere nebelvinsteren naht .
 7,4 dâ unsich inne der alte vîant ie ane vaht .
 7,5 unde die tunkelen blintheit dirre werlte zestoeret .
 7,6 sô diu jungeste trumbeschelle wirdet gehoeret .
 7,7 des sibenden erzeengeles mit dere magenkrefte .
 7,8 daz si erwechet alle redelîche geschefte .
 7,9 die des lîplîchen tôdes unze dare entslâfen sint .
 7,10 unde eroffenet besondere iegelîchiu gotes kint .
 7,11 dâ beginnet man allerêreste sehen ûzen unde innen .
 7,12 wie zierlîche dei gadem elliu den ze minnen .
 7,13 mit deme reinen golde sint gemuonet unde gesmelzet .
 7,14 die hier nechein nôt swæriu noch gæhiu verhelzet .
 7,15 vone gotes willen . rehtere werke vestere anedæhte .
 7,16 swie genôte . swie harte sie die æhtære ane væhten .
 7,17 swie sêre . si ie mêre gemuot dicke wæren .
 7,18 vone den verlogenen . den ungezogenen werltminnæren .
 7,19 die sich selben gote ire schepfære vreidigten .
 7,20 unde sie mit Worten unde werken leidigten .
 7,21 die den widermüeten allen manlîche gestênt .
 7,22 die dere nôtdürftliclichen gedulte niht abe ne gênt .
 7,23 noch weiche entwîchent dere werltlichen leitwende .
 7,24 ouwî wie schône die innerhalbe dere mûrwende .
 7,25 dere sæligen heimuote barm in sich entwæhet .
 7,26 wie lieplîche sich got in . unde sie ime næhet .
 7,27 weliche semfte mit dere meisten zumfte dâ gewinnent .
 7,28 die hier durch got die vîande tragent unde minnent .
 7,29 die in ime liebent die vriunde âne lasteres meile .
 7,30 die bekoment ime selben dâ besondere in erbes teile .
 7,31 wande dû hêrre die hêren marterære vore allen minnes .

- 7,32 sô dû noch got in allen offene rîchesen beginnes .
- 8,1 ûf dere burcmûren ist allezane dere engele huote .
 8,2 die uns bî dînen genâden sint gereht ze alleme guote .
 8,3 dâ dû mit besetzt hâs alumbe dere zinnen zîle .
 8,4 die ne geswîgent ouch dînes lobes necheine wîle .
 8,5 dîne êre . dîn lop singent si ze allen stunten .
 8,6 vone grôzem wîstuome hâs dû iz allez ervunden .
 8,7 daz diu burc geworht ist von lebentigen steinen .
 8,8 dâ sich die müeden an die linebergen sulen leinen .
 8,9 die gâhes ie mittent von deme ellende entrinnent .
 8,10 ich weiz si gotes genâden dâ semfte unde ruowe gewinnenent .
 8,11 dâ die vernozenen sulen in dere êwicheite wider wâhsen .
 8,12 dâ ne stôzent sie die egeslîche gehûrnete helleohsen .
 8,13 die beklîbent werdent dâ milticlîche gelabet .
 8,14 die hungerigen die durstigen werdent dâ gehabet .
 8,15 in dîneme hûse stâticlîche ze vollere wirtschefte .
 8,16 hêrre Krist küninc mit dîn selbes wertschefte .
 8,17 wande dû in dâ guotlîche selbe wile dienen .
 8,18 dâ ne versmâhet hêrre dir lop den anderen nieman .
 8,19 dâ sint die hêrren joch die armen alle gelîche .
 8,20 dâ teilet unsere iegelîcheme sîne gebe got der rîche .
 8,21 alsô er – die mâze an unseren gewirhten weiz .
 8,22 dâ ne wirdet verbiderbet daz schâf noch diu geiz .
 8,23 ze deme dieneste ne wirdet erslagen stier noch boc .
 8,24 an daz viur ne leget man neweder bloch noch stoc .
 8,25 erwirmen ne bedarf man ire dare gezogen oder gevüeret .
 8,26 hitze noch vrost noch dechein ungemach sie ne rüeret .
 8,27 die mit guoten werken unde willen dare gelendent .
 8,28 vone diu ist iz in heilic die iht vüre gesendent .
 8,29 si vindent iz ane den seleden allez gewis unde gereht .
 8,30 dâ ist miete unde lôn . genâde unde reht .
 8,31 wir verjehen hêrre dâ sî geistlich leben .
 8,32 man ne bedarf dâ wevel noch warf spinnen noch weben .
- 9,1 ire gewæte die dâ sint ist daz êwige lieht .
 9,2 vone diu ne bedurften si dere badegewande alanc niht .
 9,3 si ne vorderent ouch vâlen niht unde mendele .
 9,4 sumeres noch winteres ze weterlîchem wandele .
 9,5 si ne legent ze næheste dere lîch hemedede noch bruoche .
 9,6 umbe kürsene unde bellîze habent si necheine ruoche .
 9,7 ze nihte wellent si sô oder sus varwe rocke .
 9,8 dei bein ne bedeckent in hosen noch die lînsocke .
 9,9 wîz noch swarmâle schuohe bedwingent in die vuoze .
 9,10 ich wæne ie dere dürften decheiniu geruoze .
 9,11 vone diu ne spulgent si dâ neweder schepfen noch næjen .
 9,12 durch ezzen ne bedarf man daz brôt bachten noch bæhen .
 9,13 durch zuomüese vleisch unde vische sieden noch sulzen .

9,14 durch trinken habenen noch gersten ze biere mulzen .
 9,15 si ne gerent durch den durst iemer metes noch wînes .
 9,16 oder ze wolelîbe môrates noch trinkenes decheines .
 9,17 eiere unde kâse ne tuont si dâ gesoten noch gebrâten .
 9,18 got dû maht in âne dei elliu sus wole gerâten .
 9,19 si ne tuont einez noch daz andere ûf deme harste geroestet .
 9,20 allere ire nôtdürfte werdent si mit deme heile getroestet .
 9,21 daz mit in nieman mêre ringet noch ne vihtet .
 9,22 âne strælære unde bürsten wirdet in daz hâr geslihtet .
 9,23 si ruowent dâ âne vederbette . bolstere unde küsse .
 9,24 nechein wert hât der kotze dâ alsô vile sô diu zusse .
 9,25 undurft ist in lîchlachene joch dere badelachene .
 9,26 si sint es alles vervangen mit geistlîchen sachen .
 9,27 mit geistlîchen dingen ist iz in allez verwandelet .
 9,28 swer dâr anderes iht ane wænet der hât verhandelet .
 9,29 die sêle ne pflegent ze bade seifen noch louge . sie
 9,30 ne zierent ouch vingerlîn . ringe noch bouge .
 9,31 nûschelîn vone goldes gesmelze noch die halssnüere .
 9,32 ne biderbent si dâ deweder ze liebe oder ze gevüere .

10,1 nihne brennet der sunne die dâ sint über tac .
 10,2 wande er mit glanstes hitze dar gelangen ne mac .
 10,3 noch diu mâne viuhtet dâr engegen über naht .
 10,4 dâ ne ist von luftes gedwere necheinere slahte unmaht .
 10,5 dâ ne ist vone missehelle nechein vîantlich zwiwurft .
 10,6 dannen ist der ouch necheines süenæres durft .
 10,7 nieman wile noch ne mac den vride dâ gebrechen .
 10,8 waz bedorften si denne vogetes oder vüresprechen .
 10,9 ire wesen ist gezechet in michelere gelîcherte .
 10,10 in semfte unde in swifte ist allez ire geverte .
 10,11 si ne arbeitent mit vuozen noch mit handen .
 10,12 si ne erlenkent sich niener an den anewanden .
 10,13 wege unde brügge sint alle sleht unde sicher gemachet .
 10,14 alles ungemaches habent sich verzigen unde versachet .
 10,15 alle die mit dir dâ ze den êwen stætclîche sulen sîn .
 10,16 durch die got hêre genædic erbarme dich mîn .
 10,17 unde gip mir daz ich ane dem jungesten merde .
 10,18 dînere gotelîchen genâden iht verteilet werde .
 10,19 noch sôgetânere êren diu den dînen dâ geschihet .
 10,20 die daz ouge vore – werltlîchen molten hier niht ne sihet .
 10,21 die daz ôre des tîtlîchen lîbes niht ne hoeret .
 10,22 die wîle iz des werltlîchen geludemes dôz betoeret .
 10,23 diu in des mennischen herze ap infimis niht ne stîget .
 10,24 halt enne obene von genâden here nider sîget .
 10,25 unde des mennischen broeden sîn ûf ze sich ziuhet .
 10,26 unde machet daz er schiuhende vervliuhet .
 10,27 elliu dei schadelîchen oblectamenta carnis .
 10,28 al dâ nâch sô dû hêre in werclîche warnes .

- 10,29 mit des heiligen geistes trôstlîchere unctione .
 10,30 unde in inwertes gestunges salubris compunctione .
 10,31 daz er lieben beginnet elliu dei dere sêle sint profutura .
 10,32 alsô er si ze êreste hête . in dere unverwerten natura .
- 11,1 umbe den stuol sint dei hêren quatuor animalia .
 11,2 dei dîne êre predigent . dîn lop singent inder alia .
 11,3 unde vore sô vile si nâher schouwent dîne getougene .
 11,4 wande si vorne unde hinden volliu sint dere ougene .
 11,5 dei in dînem lobe dâ unde hier sint universalia .
 11,6 dere wir vergezzen noch geswîgen sulen inder alia .
 11,7 unde vore anderen dei dâ ze himele gesehen sint .
 11,8 von den sâligen ougen dei gare erwenet sint .
 11,9 in die hoehe schouwende von des vleisches gelûsten .
 11,10 dannen die irdischen allezane sîgent ze verlûsten .
 11,11 niht ze gewinne decheines vrûmen dere sêle .
 11,12 den diu helfe komen solte caelestis medelae .
 11,13 der helfeliche trôst des geistes vone deme stuole .
 11,14 der uns bringet dere sünden joch des wîzes urkuole .
 11,15 sô dannen erhoeret werdent stimme joch donerblicke .
 11,16 die dâr vone varent mit brinnenten liechten dicke .
 11,17 daz wir bî den gotes sihtigen wunderen zesamene lesen .
 11,18 in weliche wîs die sêle here nâch sulen genesen .
 11,19 sô wir etewie gedenken waz die stimme lûten .
 11,20 waz die donerblicke . waz dei brinnenten licht bediuten .
 11,21 waz uns in vier bileden dei vier animalia zeigen .
 11,22 daz wir unsich gotes kreften diemüeticlîche neigen .
 11,23 der sô getâniu wunder tuot in himele unde in erde .
 11,24 daz ire unser iegelich hier unde dâ vernunstic werde .
 11,25 ze heile unde ze genâden in den himelischen koeren .
 11,26 dâ wir die getougene alle gesehen unde gehoeren .
- 12,1 dâ sitzent vore dir in ire êrhaften sezzelen .
 12,2 die gedîhte wegent unde helfent uns âgezzelen .
 12,3 die geêrten viginti quatuor seniores .
 12,4 die dû allezane sô wir gelouben erhoeres .
 12,5 genædiclîche umbe unsere ellenden noete .
 12,6 daz unsich der alte widerwarte iht ertoete .
 12,7 alsô wir iht getuon wider dînen hulden .
 12,8 oder [wir] [iht] versûmen von unseren schulden .
 12,9 des wir von kristenlîchem rehte tuon solten .
 12,10 daz iz uns nâch unseren gewirhten niht ne werde vergolten .
 12,11 êr wir iz vertîligen mit riuwe unde buoze .
 12,12 daz wir des vone dir gewinnen willen unde müezen .
 12,13 sô dich dînere genâden bitent die zwîre zweliv hêren .
 12,14 daz uns gewerren ne mege nâhen noch verren .
 12,15 des vîandes lâge in disem wadeligen ellende .
 12,16 daz er uns mit unkûsten die heimvart iht erwende .

- 12,17 daz wir beschirmet sîn under dînere hêrschefte .
12,18 noch von ime abe geleitet werden ire genôzschefte .
12,19 die si gerne here nâch ze gebûren haben wellent .
12,20 unde dir dâr umbe ire coronas ze êren versellent .
12,21 unde bietent sich dir diemüeticlîche ze vuozen .
12,22 daz si dich mit êren lobelîche grûezen .
12,23 umbe unser êwigez heil daz si dâr mite werbent .
12,24 daz wir werden alsô sie in dir spiritu fervent .
12,25 gerehte ze dîneme dieneste ze dînere gehôrsame .
12,26 über die sô dicke geladet ist dîn heiliger name .
12,27 daz dû unsich in deme zwîvele niht ne verlâzest .
12,28 unze dû die bekorunge swiftente gemâzest .
12,29 dâ wir in disem ellende mit biren beswæret .
12,30 unde verdrückes der unser vîantlîche været .
12,31 den leidigen satanât mit sînen gelouften .
12,32 beschirmes abe durch ire gebet unsich dîne getouften